

### III. OUTRAS DISPOSICIÓNS

#### CONSELLERÍA DE EDUCACIÓN E ORDENACIÓN UNIVERSITARIA

*Corrección de erros.-Orde do 22 de agosto de 2007 pola que se resolve a do 2 de abril (Diario Oficial de Galicia do 16 de abril) de convocatoria das axudas para a consolidación e estruturación de unidades de investigación competitivas do sistema universitario de Galicia do ano 2007, en réxime de concorrencia competitiva.*

Advertidos erros na devandita orde, publicada no DOG nº 169, do 31 de agosto de 2007, cómpre facer as seguintes correccións:

Na páxina 14.581, punto primeiro, parágrafo 1, liñas 6 e 30 da táboa, onde di:

Nº expediente	Solicitante	SUG	Axuda (€)*
2007/044	Blanco Álvarez, Jorge	USC	70.000
2007/101	Soto Otero, Ramón	USC	50.000

Debe dicir:

Nº expediente	Solicitante	SUG	Axuda (€)*
2007/044	Blanco Álvarez, Jorge	USC	50.000
2007/101	Soto Otero, Ramón	USC	70.000

#### CONSELLERÍA DE INNOVACIÓN E INDUSTRIA

*Orde do 3 de outubro de 2007 pola que se convocan axudas para a consolidación e a estruturación de unidades de investigación competitivas do sistema galego de I+D+I do ano 2007, en réxime de concorrencia competitiva.*

O Estatuto de Galicia recolle no seu artigo 27.19º que lle corresponde á Comunidade Autónoma galega a competencia do fomento da cultura e da investigación en Galicia, sen prexuízo do establecido no artigo 149.2º da Constitución.

A Lei 12/1993, do 6 de agosto, de fomento de investigación e desenvolvemento tecnolóxico de Galicia, no seu artigo 1º, establece como obxectivo xeral o fomento da investigación científica e a innovación tecnolóxica para promover o desenvolvemento económico, social e produtivo de Galicia, e crea para lograr este obxectivo o Plan Galego de Investigación e Desenvolvemento Tecnolóxico. O Consello da Xunta de Galicia, na súa reunión do 21 de setembro de 2006, aprobou o Plan Galego de Investigación, Desenvolvemento e Innovación Tecnolóxica - INCITE (2006-2010).

No Decreto 231/2006, do 23 de novembro, indícase que lle corresponde á Dirección Xeral de Investigación, Desenvolvemento e Innovación a ordenación,

planificación, coordinación, execución e seguimento das competencias en materia de fomento da investigación que ten atribuídas a Comunidade Autónoma de Galicia.

Segundo o establecido na Lei 12/1993, do 6 de agosto, o Plan Galego de Investigación e Desenvolvemento Tecnolóxico (INCITE) está integrado por tres tipos de programas: programas horizontais, xerais e sectoriais. Os programas xerais están dirixidos particularmente á promoción da actividade innovadora do sistema público de I+D+I, e dos centros tecnolóxicos. Entre eles, o programa xeral de consolidación e estruturación do sistema de I+D+I trata de contribuír á consolidación e especialización competitiva das unidades de investigación, buscando corraxir a excesiva fragmentación e constatable dispersión de capacidades que mingua a potencialidade científica e tecnolóxica do sistema galego de ciencia e tecnoloxía.

A materialización destes obxectivos require de novos instrumentos que potencien a organización competitiva e a dotación dos recursos necesarios para dar un salto significativo na calidade e impacto dos resultados da actividade científica. No INCITE considérase a concesión de axudas a grupos de investigación, baixo a fórmula de contratos programas, como un instrumento que contribúa a dimensionar e cohesionar os grupos de investigación, e potencie a complementariedade das capacidades dispoñibles no sistema. En definitiva, é a aposta por grupos de maior dimensión, interdisciplinares e especializados en liñas de investigación que encaixen entre si e garantan que o sistema galego de ciencia e tecnoloxía atende os temas de maior relevancia para Galicia.

Así mesmo, dentro deste programa inclúense as axudas dirixidas aos centros de investigación con actividade investigadora que poida cualificarse de excelente co fin de dotalos de apoio específico. Recóllese a concesión de axudas en función dun programa por obxectivos que permita estimular a investigación para levar a cabo proxectos altamente competitivos e estratéxicos.

Mediante esta orde convócanse axudas dirixidas aos centros de investigación e grupos de investigación do Sistema Universitario Galego (en adiante SUG) e demais organismos do sistema público de I+D+I. Estas axudas, que recoñecen e premian o esforzo na obtención de resultados de calidade, concédense sobre a base dos resultados contrastables da actividade investigadora e co compromiso de desenvolver un programa por obxectivos particularizado para cada beneficiario da axuda e no que se plasmen os fitos que se agardan obter, necesariamente ligados a unha mellora contrastable nos resultados da actividade investigadora, considerándose a súa renovación en función do cumprimento dos obxectivos fixados. Convócanse, así mesmo, as axudas para o ano 2007, que terán vixencia durante o período 2008-2010. Anualmente, publicarase no *Diario Oficial de Galicia* a convocatoria correspondente, en que se establecerán os requisitos e condicións para a súa concesión.